

**POSIBLES IDEAS PARA  
UNHA HOMILÍA CON NENOS  
15 DECEMBRO 2019**

**Fará Ditosos os Descartados,  
Refugados, Desprezados, Desvalidos...**

**1.Ver: O ADN de Xesús.**

- Hoxe falamos moito do **ADN** das persoas, o que nos identifica...
- Tamén se fala do DNI: Nomes... Fillo de... Pais... Nado en... Profesión... Son as nosas raíces, a nosa identidade... Inventádevos o ADN ou DNI de Xesús.

***Que escribiriades na ficha de Xesús?***

**2. XULGAR: Identidade dos seguidores de Xesús.**

- No evanxeo Xoán, desde o cárcere envía os seus amigos a Xesús e preguntarlle quen é e que é o que fai. Xesús responde: “os cegos ven, e os inválidos andan; os leprosos quedan limpos, e os xordos oen; os mortos resucitan, e aos pobres anúnciaselles o Evanxeo”. Non dá un discurso de palabras bonitas, predica coas obras: isto é o que fago, isto é o que son: salvo, curo, limpo, libero, dou vida, alegre a vida dos pobres...

**QUE NOS QUERE DICIR XESÚS?**

- Neste 3º domingo Xesús dinos que **A IDENTIDADE** de Xesús e dos que lle seguimos debe ser a **ALEGRÍA, o COMPARTIR, ALIVIAR O MAL.**

**\*A ALEGRÍA... Por que?** Xesús vén enchernos de alegría porque el é a alegría de Deus que vén salvarnos. Xa non hai tristeza, a nosa vida ilumínase.

**\*O COMPARTIR... Por que?** Porque se queremos ser coma el, o camiño é compartir, darnos aos demais e vivir para eles. El

pasou “facendo o ben”. En Nadal colaboremos con Cáritas, fagamos xestos, obras, como Xesús.

**\*ALIVIAR O MAL:** Xesús enche o mundo de esperanza dando vista aos cegos e saúde aos enfermos... É o que di Isaías: **“Fortalecede as mans débiles, afianzade os xeonllos vacilantes”**. Esa é a nosa misión: sandar, curar, consolar, limpar... En palabras do papa, fagamos Ditosos os Descartados, Rexeitados, Desprezados, Desvalidos... A nosa comunidade debe ser tamén unha **comunidade curadora**. (próxima aos que sofren, atenta aos enfermos, consoladora, asistencial, promocionadora...), **máis dos pobres...** (Francisco: *“como me gustaría unha Igrexa pobre e para os pobres”*).

***Como vivir a alegría do evanxeo? Que podemos compartir?***

### **3. ACTUAR: Achegamos a Xesús a outros.**

-**Preparamos** panxoliñas, belén, belén vivente... Colocamos as figuriñas do Belén, todas son bonitas e miran cara ao Neno Xesús, todas se dirixen ao portal. Están quedas, é certo, pero sempre algún neno as achegas ao portal. Grazas, mozos, por achegarnos a Xesús.

-**Acendemos a 3ª candeia e vemos como podemos vivir mellor a alegría** do evanxeo e contaxiala a outros neste Nadal cantando panxoliñas e sementando estrelas polas rúas.

-**Escribimos** cada un o nome de dúas persoas que necesiten da túa alegría ou da túa axuda á túa ao redor. -**Organizamos a campaña solidaria de Nadal** compartindo xoguetes, alimentos, diñeiro... Convén preparalo con Cáritas.

-**Para as ofrendas**, traballando a alegría, poderíase pedir a cada neno que debuxase o seu rostro riseiro e o colocase nun cartel e alguén lese: “Ofrecemos o noso sorriso como sinal da alegría polo nacemento de Xesús en Belén”.

***Que imos facer?***

# A PALABRA

**ISAÍAS 35, 1-6a. 10:** *Deus vén en persoa e havos salvar.*

O deserto e o ermo exultarán, alegrarase a estepa e florecerá, xermolará e florecerá como flor de narciso, festexará con gozo e cantos de xúbilo. Foille dada a gloria do Líbano, o esplendor do Carmelo e do Sarón.

Contemplan a gloria do Señor, a maxestade do noso Deus. **Fortalecede as mans débiles, afianzade os xeonllos vacilantes; dicide aos inquedos: «Sede fortes, non temades. Velaquí o voso Deus! Chega o desquite, a retribución de Deus. Vén en persoa e ha salvarvos».**

Entón se despegarán os ollos dos cegos, os oídos dos xordos abriranse; entón saltará o coxo como un cervo. Retornan os rescatados do Señor.

Chegarán a Sión con cantos de xúbilo: alegría sen límite nos seus rostros. Domínanos o gozo e a alegría. Quedan atrás a pena e a aflicción.

*Palabra do Señor.*

**SALMO 145:**

**R/. Ven, Señor, salvarnos.**

**SANTIAGO 5, 7-10:**

***Fortalecede os vosos corazóns, porque a vinda do Señor está a chegar.***

**SAN MATEO 11, 2-11: Es ti o que ha de vir ou temos que esperar a outro?**

**Narrador:** Naquel tempo, Xoán, que oíra no cárcere as obras do Mesías, mandou os seus discípulos a preguntarlle:

**Discípulos:** -«*Es ti o que ha de vir ou **temos que esperar a outro?**».*

**Narrador:** Xesús respondeulles:

**Xesús:** -«*Ide anunciar a Xoán o que estades vendo e oíndo: **os cegos ven, e os coxos andan; os leprosos quedan limpos e os xordos oen; os mortos resucitan e os pobres son evanxelizados. E benaventurado o que non se escandalice de min!**».*

**Narrador:** Ao irse eles, Xesús púxose a falar á xente sobre Xoán:

**Xesús:** - «*Que saístes a contemplar no deserto, unha cana sacudida polo vento? Ou que saístes a ver, un home vestido con luxo? Mirade, os que visten con luxo habitan nos palacios. Entón, a que saístes?, a ver a un profeta? Si, dígovos, e máis que profeta. Este é de quen está escrito:*

**Escritura:** -“*Eu envío o meu mensaxeiro diante de ti, el preparará o teu camiño diante túa*”.

**Xesús:** -*En verdade dígovos que non naceu de muller un máis grande que Xoán o Bautista; aínda que o máis pequeno no reino dos ceos é máis grande ca el*».

**Palabra do Señor.**

*(Narrador-Discípulos-Xesús-Escritura).*